

教女學治事文編

一函
二冊

慈學治事文編卷二

山陰湯蛰仙先生點定

通商各國人民均准照其國法律治理日本換約已力爭得此條惟不允

中國援照各報皆以爲大辱能否力爭試言其策

汪庚年

嗟乎彼西彝侏儒其言語狡獪其人情詐爲癡愚詐以貨賄以牢籠我震且魚肉我支那渺如也于是條約所定利皆歸被害皆歸我皆爲固然無足爲怪所最不可解者莫如法律一事我國之人民在彼國彼可以法律治之彼國之人民在我國我不得以法律治之豈他國有天主天方希臘羅馬相傳之法律我獨無堯舜禹湯之武周孔相傳之法律乎況泰西各國均各照其國法律此尤其顯然愚我欺我者也日本最爾島國僻處東瀛猶能改約定制申大權於天下我中國乃俯首帖耳屈大柄於環球或曰中國貧弱且甚欲改約將有待噫此自餒之言何足與之謀國苟辭嚴義正有何不可爭也爰畫其策如左

一公法可援引也公法云客民被他人欺凌損害者其經理之責首在彼國客民不應俟本國干預夫客民被入欺凌尙憑所在之國經理則客民欺凌他人其必由所在之國經理可知又云如不俟地方官照例辦理而

駐京公使等輒行干預者過也公使不能干預領事可知今各國俱照公法雖我中國原不必入公法之中然公法爲各國之公法今事關八國卽以公法問之各國亦無辭以對也不待力爭而事可決矣

一條約可更正也通商之國英最先英國天津約第十六款云英國民人有犯事者皆由英國懲辦是英人已欺我矣自後若法美俄瑞哪布魯丹日比美奧和日本等國皆援英人之例眾口一辭定約之初絕不察彼族譟張草率了事乃糾繆至此此誤議也公法曰因未知而誤議者倘有大事顯露卽可廢其議焉今各國通行之例而中國獨受其欺其誤孰甚則此議可廢可廢卽可改雖改約原非易事然此約係英人先誤而各國因之卽以此約問之英人英人決不能以虛辭相抵西方久推英執牛耳英人旣許他國皆從風而靡矣

一情理可相通也公法家一則曰天理人情再則曰天理人情則天理人情固未盡泯於彼族而爲彼族之所重者矣今各國各用其國之法律吾不得用中國之法律是不以自主之國待中國無是情也無是理也況中國爲亞東大國而曾日本之不如則所謂大情人情者果安在乎夷人尙信今與日本有信與中國無信焉可行也

凡此數條皆直在我曲在彼者也奈公法非權勢不行條約已鐫成錢錯復何情理之足云而各國之所以不允者亦自有故或曰中律重洋律輕中國人與洋人交涉之獄概用洋律治理彼必樂從矣此允與不允同況以中國而用洋律則國柄潛移流弊將不可掇究之中國之政敝莫獄爲甚文告既繁相遁以僞一切皆聽於獄吏以意爲輕重聽斷無時不肖之吏恃刑求獄動加桎梏捕役獄卒皆藉敲朴爲生相倚爲奸而獄官不詰民未定罪先受非法刑求及入獄門又有獄卒之私刑拷掠其於先王明刑弼教之意相去萬里攷外國之獄小民絕無牽累官吏不能蒙蔽小犯二三日定讞遲無過七日重犯四十日定讞遲無過兩月其在獄者衣食服用概與常同復有聖經書籍令本犯肄習修省使之改過自新其與我中國先王之意不甚相遠然則以今日中國之獄吏治洋獄無論用洋律用中律其必以小獄釀大禍也明矣夫亦何怪其不允哉我中國果能上法先王近採西政天下獄官一體清澈則民氣揚國法立政簡刑清卽自強之基亦在乎是公法可援條約可改情理可通彼亦無從藉口于中國刑獄之敝而萬無不允之理矣乃當軸泄泄沓沓敝屣國政草菅人命致使各國領事明目張胆干預詞訟蟠踞把持無所不至而中國人民含怨

懷怒無從發洩乃激而焚教堂殺教士爭投於法網彼則藉端開釁賠款動巨萬勒我租界而中國人民被其害者多置不聞流弊至此可慨也夫大處落墨層層洗發語語靠寔尊周室攘夷狄維持國政近于天理人情司民命者所當審慎詳明無枉無縱此作可謂老吏斷獄至其筆陣之縱橫氣勢之豪邁性情之忠憤心地之肫誠自有天授非可強爲通商各國人民均准照其國法律治理日本換約已力爭得此條惟不允中國援照各報皆以爲大辱能否力爭試言其策

程桂芬

以億兆年不相聞問之域數萬里絕無樛葛之人而傳教則許入內地遊覽則給與護符體恤周全無微不至固宜感

聖朝柔遠之恩而相安無事矣乃反恃勢欺陵草菅人命豈非千古未有之奇

變乎然原其禍皆自立約不慎始查泰西通商各國人民均准照其國法律治理此地球上通行之例也我中國初立約時未諳西例遂允洋人以洋法治理華人以華法治理于是洋人之來華者每以地方官不得約束肆意妄爲毫無忌憚以至交涉之案層見疊出而中國官長又皆畏蕙無能遇事遷就卽有巨案亦僅予以薄懲苟且完結甚有命案已犯而洋官暗遣回國究詰無從非特輕法未加抑且無法以治而中國人民或傷一

教士燬一教堂則必議抵償議罰賠無能免者甚且恫喝要求又或累及
長官添開商埠佔我海口此尤事之不平者也曩者日本通商其立約亦
與中國無異自明治維新而後各國見其日臻強盛不敢復以威勢相凌
故于換約之時已力爭得此條而堂堂中國反不能按照日本不誠大可
恥耶是宜于下屆修約之期力以爭之堅以持之務必更正條約如日本
則彼亦無如我何況攷禹國公法有云凡疆內產業植物動物居民無論
生斯土者自外來者按理皆當歸地方律法管轄疆內行止舉動契據事
件莫不歸其所制又云無論他國律法如何並人民各存私見如何總不
能不歸地方管轄由此觀之我中國所與爭者固非出于公法之外也以
彼之矛攻彼之盾彼將何辭以對耶雖然公法恃權勢而行有權勢而公
法是恃無權勢而公法不可憑我中國苟能自強則公法以復我自主
之權固自易易但中西刑法輕重懸殊居今日而欲舍輕從重誰肯降心
卽如日本換約爭得此條雖由強盛使然抑亦改從西律輕重畧同故久
國皆允其議而一無異詞也爲今日計惟有將各國刑律一概譯出並參
以公法修約及

大清律例變而通之化而裁之務使斟酌盡善然後定一中外通行之訊法刊

爲中西讞案之刑書嗣後如遇華洋訟件俱照此書辦理則審問定讞開卷了然亦何至臨事徬徨如從前之毫無把握哉使于此而猶不能行卽專以洋法治之亦無不可何則以洋法治洋人則洋人無所逃于法之外以洋法治華人則華人亦得就其法之輕至于內地各案中國自有舊章固不必援以爲例也

挽救中國人民不使吃虧平則不鳴隱強訟端保全性命非鮮立法施非若人所難能說不能行是所望于有邦交之責者文生于情氣疏以達慈祥惻怛之懷躍躍欲出

中國通商增開口岸宜如何使稅釐兩不相害策

范晉

自海禁開而稅則定軍餉絀而釐捐行創辦之初華洋並輸稅釐猶兩不相妨也泊子口半稅之約立而釐金受害矣租界免釐之議行而釐金益受害矣何則中國之奸商往往勾通洋人互相蒙蔽于是洋人代華商領半稅單而私取其費者有之華商代洋人裝運貨物而冒用護照者又有之黠鼠善幻遂至洋關稅項歲不加增內地釐金日形減色况今者通商之口岸益增洋人之把持日甚議加稅則權不我操欲撤釐而用又無出至今日而欲稅釐兩不相害是亦無可如何矣然歲入之款以稅釐爲大

宗使不設一策以預爲之防甚非所以保利權也竊謂保今日之利權誠莫如併釐金于關稅改釐捐爲鋪捐之爲愈夫所謂併釐于稅者非謂舉天下之釐金而盡併之于關稅也不過于通商各口岸併收其正稅半稅耳其內地各處釐卡皆宜一律裁撤洋商進口貨物于洋關併交正稅半稅後無論運往何地概不抽釐華商土貨無論出口與不出口一律仿辦其有包攬偷漏者重罰之如是則關稅之所入每歲必有起色而商販之行運自無阻滯之虞矣鋪捐者徵之坐賈所以易抽釐之名而存抽釐之實也法宜就省會釐捐總局頒發詳細章程于各府縣分局榜之門何者捐何者免捐案鋪戶之大小以定其捐之多寡如鋪戶有年行銷之貨物約計值銀若干兩本屆卽抽其百分之一以爲鋪捐續開歇業隨時報明以增損其數凡徵收鋪捐肯責成分局之委員而悉去其狼虎之司事巡丁或由巨業之鋪戶與其公所之紳董按月收繳隨時給發總局印照爲憑不勞而理官商交便如是則數十年欲除未能之稅政毅然廓清策無便于此者誠能一旦剷而去之變而通之非特費省利溥歲入之款可倍于釐金而商務之贏絀可以知中國之利權可以保當軸者其亦知所變計乎

開達理幹明于部分殷憂啟 聖銳意維新當有見諸施行之日特江
浙各局太河半已倒授稅司則非巨款河清枰釐不能自主姑存此一
段議論可耳

藏防要地策

汪庚年

三藏形勢長圓如雞卵東北與四川雲南新疆甘肅接境其西南皆界印
度東南一角緬甸爲鄰其正西有和闐之北蟠依山僧格喀布山至阿甲
之西則起雪山其山高聳獨出插入雲霄有狼干喀巴布麻而佳喀巴布
達木綽克喀巴布諸山環繞數重綿亘五千餘里其地八月卽大雪封山
終年積雪成冰卽西人所謂喜馬拉雅山也高無與匹自西而南間于西
藏印度之間往者疊觸相爭士卒凍斃無一生還殆天之所以蔽衛藏而
固滇蜀之藩籬也與西藏爲鄰者有喀爾喀哲孟雄大吉嶺及印度之克
什米爾諸部落惟廓爾喀時時入寇故籌藏防者莫不以札什倫布薩加
溝曲多江鞏彭錯嶺爲後藏要隘以協噶爾定日絨轄喀達定結三喀瓊
噶爾鞏唐拉大山曲水巴江攷爲前藏要隘以江攷迤南之帕克里甘霸
等處界連藏曲大河爲前藏後要隘其外則有前濟隴聶拉木等處以爲
扼要固皆憑藉雪山爲屏障因地制宜設險以固廓弟世世守之必

無意外之虞矣然而今昔異時強弱異勢變遷異宜向之大可恃者今日一無可恃向之據爲險者今且盡失其險印度之克什彌爾及廣爾喀哲孟雄大吉嶺皆可以通西藏惟大吉嶺最爲樞要由大吉嶺轉東北三程至塔蘇登又三程至布魯克巴踰嶺卽帕克呈北行二站至江孜卽前藏矣初以雪山封阻行李維艱爲愚未劇今印度爲英吉利藩屬大吉嶺一路英人已築鐵路自印度之孟加拉登火車一夜可達夕力格里自夕力格里乘馬車一日可至大吉嶺現英人日加修治夕力格里之鐵路亦將告成則火車可由孟加拉直達大吉嶺此間崇山疊嶂別無通都大邑商貨薈萃之所乃英人不惜重貲拔木通道則其包藏禍心而注意于藏也匪伊朝夕矣且詭計百出用重賂以要結布魯克巴哲孟雄廓爾喀諸番入其牢籠相爲響應則曩者之要隘可以防廓夷不可以防英吉利以時勢論今宜于江孜定日帕克呈三處整頓防務以備履霜之漸孟加拉之東英人現又闢一徑曰亞山英人嘗欲開路直抵前藏至滇蜀兩省然其間山則重巒峭壁無可梯繩水則急溜奔瀾不任舟筏卽五丁無所施其勇而怒江一帶不可無不虞之備若其北方現俄羅斯之鐵路已築至蔥嶺屯兵于此與後藏相逼甚近其意本在印度而英人力爲隄防軍兵駐

守或可無事然殃及池魚之慮恐亦不免則後藏之江里馬孫阿林雜雜達巴模野公塔拉等處又不可不戒嚴矣

指陳確鑿區策精詳是才大心細之作

藏防要地策

胡宗湘

西藏之防與他省異大抵以控要隘扼樞梁爲重昔人指隴形勢如哈拉烏蘇彭多宗松根阿脚等不下十餘處爲千古設防者所莫能外獨是今昔異勢安危異軌成法亦有不合泥者夫英得印度駸駸焉求展其兩翼何嘗一日忘布達拉札什倫布乎近日錢軌遂遣哲孟雄境上覬覦乘釁其是何居心西藏之有英也譬如木之有蠹也人之有腹心之疾也不變則已一變而蠱起爲西藏患者孰大乎英乎雖然藏地亦非一無可守者也東爲內地北有伊犁爲之捍蔽其通准噶爾之路冬則積雪難行夏則水草多阻天所以限戎馬之足藏番可高枕無憂也西與克什米爾毗連由日喀則城達彼處只一路相連名帕里部耳苟屯重兵尙難飛渡所耽耽逼人而危在呼吸間者曰惟布魯克巴廓爾喀一帶接壤之通而哲孟雄猶首塞其衝英人知其然也所以全力注此者亦倍至相臺立約以後英于哲孟雄小部固已挈其庭掃其閭郡縣而置之彼廓爾喀者乃隱敵

之計中而不知悟則藏之安地在今之南隅也明甚雅魯藏布江居地之上游誠宜節節布置所惜者藏有可守之要地而無能守之將才耳其民獷而好鬪

見元史

故玩寇而多輕用其鋒日柄宗之戰大受巨創皆前車可鑒者也爲西藏計誠宜爲堅壁清野之策嚴防設而不可妄言戰敵人果

至吾但閉關以老其師以逸待勞因勢乘使此上策也敵之所恃者輪艦巨砲今峻嶺深箐之內彼無所施其長技豈肯深入無援之地以自取覆亡乎夫防之既得則西藏安西藏安而川省安川省安而西南之大局皆安於庫豈不重歟

前後兩藏之南已爲英據則防英自是要著篇中指陳諸地攷證明確陸軍全改洋操得失安在

程桂芬

居今日而圖自強以練兵爲第一大政居今日而言練兵尤以洋操爲第一要著近年如江南有自強軍天津有新建陸軍俱以練習洋操今有幡然改圖破除積習將京直各省旗綠防營兵勇一律改練計勇營兩名併練洋操一名綠營三名併練洋操一名就舊有之餉練新式之軍減老弱之軍增丁壯之餉不必司農借箸而兵制已煥然更新此誠中國轉弱爲強之一大機關也雖然中國之弊取患徒務虛名不能寔事求是洋操步

伐整齊號令純一槍砲精良施放有準練兵之法誠莫善於此矣然苟徒襲皮毛不求要領而輒然號于天下曰改鍊洋操也改練洋操亦不過徒飾觀瞻已耳烏敢信其有得無失乎往者各省勇營率多用前膛來復槍或毛瑟舊槍所習技藝中西參半而行之數年卒無成效非以練習不精之所致抑是必認真操演精益求精庶餉無虛糜兵無虛籍不至蹈前日綠營勇營之弊至于洋操教習必須重聘洋將特遠道招致各省需用多人員數多而辛俸鉅且中西遼隔語言文字又不相同苟無譯官卽口講指畫終形隔闕現在江南自強軍已募二千八百六十人天津新建陸軍已募七十人均延德人教練其中必有材力出眾得其精奧者今所需洋操教習南洋卽于自強軍中挑選北洋卽于新建軍中挑選則餉額不需加增而訓練易爲力抑又有說焉各國軍械無不一律今中國製造機器已未能精復不一式全使甲午之役有子彈俱盡而各營不能通用者宜令各省製造局精求槍砲子彈之造法酌定格式大小從同庶頒之各營觀若畫一卽有遺乏而彼此相通不至柄鑿故洋操既精練習而製造尤不可不講求也

洋操卽于南北洋軍中學成者挑選教習及酌定火器格式均中肯綮

防俄策

程桂芬

俄羅斯跨踞兩洲又遠及于亞墨利加海內一大國也前者欲逞志于西方以混一歐洲全局而英法德奧諸國力皆足以相抗于是不得志于西畧轉銳意於東封我中國東西北三面如吉林奉天黑龍江內外蒙古遼遼以至新疆在在與之接壤自咸豐八年以後爲我邊患亦已數見不鮮故中國防邊之道于俄最急雖然防俄于昔日易防俄于今日難昔日朝鮮未失屏藩猶固也旅順未租門戶難逾也今則朝鮮已歸保護矣旅順又許屯兵矣況西伯利亞鐵路又將直接東三省得步進步咄咄逼人譬如穿窬之盜已入堂闔癰疽之患漸及腹心嗟嗟民今日而言防俄誠有萬難措置者竊思六國聯合以拒秦吳蜀結親以拒魏向者俄人窺伺土耳其欲撤歐洲之藩籬以扼其吭而拊其背英以聯合各國併力拒俄俄人無可如何偃旗息鼓俯首降心不敢飲馬於大奴皮江者垂數十載故爲今之計獨力以防俄不如合力以防俄此連橫之策所以不可不用也其策奈何曰首聯英次及日蓋英雖僻在歐洲自佔據印度緬甸全境命脈精神皆在亞洲之內東方商務首屈一指是亞洲之安危寔關係英人之痛癢倘使禍結兵連久而不解商務因之日衰豈不大受其害況俄人

貪得無厭其注意印度匪伊朝夕倘東得志於亞土勢必鼓行而西以進
窺印度恐英亦獨力難支故中英聯合非特中國之利亦英人之利也日
與我同洲同文且同種也甲午之役特路我以自存今亦有悔心焉寢饋
不敢忘俄之蠶食日與英誼又固一舉而兩得日論者動以忘仇結好爲
恥高祖下楚句踐事吳卒報復之此高飛戢翼之意也今使遣一介行人
以利告英以害告日則英日必樂爲我助英日相助而我與俄勢均力敵
俄必知難而退不敢遽發難端由是育人才闢地利籌餉練兵亟亟爲自
強之計行之十年必有成效可觀至有成效而後據十五年贖回鐵路二
十五年取回旅順之約力索於俄俄必無辭以對卽或不從而我乃聲其
背約之罪布告中外與英日併力合攻俄雖強其能敵乎能戰然後能守
能守然後能和敢以質諸當局者

聯英日以拒俄最是要著

防俄策

王夢松

自錫伯里亞之鐵路興而東防潰旅順大連灣之腹地割而重門開其貪
得無厭故思啟已駸駸乎有席卷天下之勢處處可以入犯事事可以
挑釁幾乎防之無可防矣而欲于無可防之中求其防之之要一曰固根

本俄既索租旅順大連灣開通商口岸且準專派馬步營數隊駐紮要站以期保護商務一旦與我失和或且長驅直入豕突狼奔擾我

畿輔誰復有攔阻者宜于天津海口以及甯古塔琿春城等處駐重兵嚴戒備有事則以津軍扼其前而以琿春城甯古塔爲遙應俄知中國有備亦何敢輕于覬覦自開邊釁並請

特簡親臣簡閱衛士分置盧溝橋等要爲津師後勁如是而根本可不搖矣昔晉欲遷都王導鎮之以靜卒賴以安今日之事何獨不然二曰造鐵路俄自裏海東已造鐵路至謀夫距霍罕不遠霍罕接嘉峪新疆有警華兵雖強遲恐不及速當由嘉峪關造一鐵路至吐魯番總匯分兩支一嚮天山北聯絡各城至伊犁一向天山南至喀什噶爾此防俄于西北也東則則山聖彼得主琿春以及旅順造鐵路以拊我吉江之背倘與我爲難以運作迅雷不及掩耳之舉宜由山海關造一鐵路至奉天至伯都訥又東北沿混同江至三姓又南沿瑚爾哈河至甯古塔黑龍江城等處有變則近三姓甯古塔兵以遏之而以伯都訥爲策應遠運黑龍江城兵由陸路直擣巢穴其首尾自不能相應矣三曰精營制近來泰西各大國礮彈力甚猛人每以地營之法避之然不便於擊人惟改用地壕隔數尺鑿一溝置

兵勇于中其隊四散起伏較便抑或築土牆外厚內薄中隔數尺以次遞築多築數層更穩雖外層擊毀彈力不能再破二層彈發則伏牆以避之止則出牆以禦之夷砲雖多且利亦將不繼況天津地勢平坦陸路尤當留意甲午越南之役提督馮子材蘇元春嘗依此法樹績邊陲正可仿而行之四曰練鄉團甲午受日人大創割地賠款其故皆由內奸暗爲綫索知朝廷必將講和匪獨道光鎮海之師咸豐大沽之禍爲然故欲戢內奸必先團練團練一興耳目易周一發其奸衆怒難犯必立置之死地外人之畏官軍不如其畏鄉勇粵東三元里之事顯然可證今誠踵保甲成局于邊疆興團練或五家爲伍或十家出卒因地制宜維郡縣之便平時則守望相助可消隱伏之警變時則矛戟相持足備行枚之選虎豹在山樵薪不采但能寔力奉行奸宄已無所容足蓋閭左棘矜勝于樓船戈甲多矣五曰聯外援英與俄勢不兩立俄苟逞志於華必中英人之所忌邇日俄之號令赫赫乎越黑海而南烽火將達印北英之君臣盱食宵衣已無如何也今假使臣以全權之名固結于英又以同洲同種向倭婉告釋釋前怨重立盟書互爲唇齒倭心旣得與英人鼎足而峙以保東亞之局英利于商務而倭之疆圉亦固當必有忻然應者御史文悌聯英拒俄一疏